

全唐诗卷三百三十二

卷 332_1

【早春对雨】羊士谔

南馆垂杨早，东风细雨频。
轻寒消玉笋，幽赏滞朱轮。
千里巴江守，三年故国春。
含情非迟客，悬榻但生尘。

卷 332_2

【永宁小园即事】羊士谔

萧条梧竹下，秋物映园庐。
宿雨方然桂，朝饥更摘蔬。
阴苔生白石，时菊覆清渠。
陈力当何事，忘言愧道书。

卷 332_3

【台中遇直，晨览萧侍御壁画山水】羊士谔

虫思庭莎白露天，微风吹竹晓凄然。
今来始悟朝回客，暗写归心向石泉。

卷 332_4

【过三乡望女几山，早岁有卜筑之志】羊士谔

女几山头春雪消，路傍仙杏发柔条。
心期欲去知何日，惆怅回车上野桥。

卷 332_5

【和李都官郎中经宫人斜】羊士谔

翡翠无穷掩夜泉，犹疑一半作神仙。
秋来还照长门月，珠露寒花是野田。

卷 332_6

【山阁闻笛】羊士谔

临风玉管吹参差，山坞春深日又迟。
李白桃红满城郭，马融闲卧望京师。

卷 332_7

【登楼】羊士谔

槐柳萧疏绕郡城，夜添山雨作江声。
秋风南陌无车马，独上高楼故国情。

卷 332_8

【忆江南旧游二首】羊士谔

山阴道上桂花初，王谢风流满晋书。
曾作江南步从事，秋来还复忆鲈鱼。
曲水三春弄彩毫，樟亭八月又观涛。
金罍几醉乌程酒，鹤舫闲吟把蟹螯。

卷 332_9

【郡中即事三首】羊士谔

晓风山郭雁飞初，霜拂回塘水榭虚。
鼓角清明如战垒，梧桐摇落似贫居。
青门远忆中人产，白首闲看太史书。
城下秋江寒见底，宾筵莫讶食无鱼。

卷 332_10

【郡中即事三首（一作《玩荷花》）】羊士谔

红衣落尽暗香残，叶上秋光白露寒。
越女含情已无限，莫教长袖倚阑干。

卷 332_11

【郡中即事三首（一作《寄裴校书》）】羊士谔

登临何事见琼枝，白露黄花自绕篱。
惟有楼中好山色，稻畦残水入秋池。

卷 332_12

【野望二首】羊士谔

萋萋麦陇杏花风，好是行春野望中。
日暮不辞停五马，鸳鸯飞去绿江空。
忘怀不使海鸥疑，水映桃花酒满卮。
亭上一声歌白苧，野人归棹亦行迟。

卷 332_13

【游西山兰若】羊士谔

路傍垂柳古今情，春草春泉咽又生。
借问山僧好风景，看花携酒几人行。

卷 332_14

【泛舟入后溪（后一首一作于鹄诗）】羊士谔

东风朝日破轻岚，仙棹初移酒未酣。
玉笛闲吹折杨柳，春风无事傍鱼潭。
雨馀芳草净沙尘，水绿滩平一带春。
唯有啼鹃似留客，桃花深处更无人。

卷 332_15

【看花】羊士谔

一到花间一忘归，玉杯瑶瑟减光辉。

歌筵更覆青油幕，忽似朝云瑞雪飞。

卷 332_16

【春望】羊士谔

莫问华簪发已斑，归心满目是青山。
独上层城倚危槛，柳营春尽马嘶闲。

卷 332_17

【寄江陵韩少尹】羊士谔

别来玄鬓共成霜，云起无心出帝乡。
蜀国鱼笺数行字，忆君秋梦过南塘。

卷 332_18

【贺州宴行营回将】羊士谔

九剑盈庭酒满卮，戍人归日及瓜时。
元戎静镇无边事，遣向营中偃画旗。

卷 332_19

【游郭驸马大安山池】羊士谔

马嘶芳草自淹留，别馆何人属细侯。
仙杏破颜逢醉客，彩鸳飞去避行舟。
洞箫日暖移宾榻，垂柳风多掩妓楼。
坐阅清晖不知暮，烟横北渚水悠悠。

卷 332_20

【故萧尚书瘿柏斋前玉蕊树，与王起居吏部孟员外同赏】羊士谔

柏寝闭何时，瑶华自满枝。
天清凝积素，风暖动芬丝。
留步苍苔暗，停觞白日迟。
因吟茂陵草，幽赏待妍词。

卷 332_21

【和武相早朝中书候传点书怀奉呈】羊士谔

殿省秘清晓，夔龙升紫微。
星辰拱帝座，剑履翊天机。
耿耿金波缺，沉沉玉漏希。
彩笺蹲鸕兽，画扇列名羣。
志业丹青重，恩华雨露霏。
三台昭建极，一德庆垂衣。
昌运瞻文教，雄图本武威。
殊勋如带远，佳气似烟非。
抗节衷无隐，同心尚弼违。
良哉致君日，维岳有光辉。

卷 332_22

【和萧侍御监祭白帝城西村寺斋沐览镜…吏部孟员外并见赠】羊士谔

晚沐金仙宇，迎秋白帝祠。
轩裳烦吏职，风物动心期。
清镜开尘匣，华簪指发丝。
南宫有高步，岁晏岂磷缁。

卷 332_23

【送张郎中副使自南省赴凤翔府幕】羊士谔

仙郎佐氏谋，廷议宠元侯。
城郭须来贡，河隍亦顺流。
亚夫高垒静，充国大田秋。
当奋燕然笔，铭功向陇头。

卷 332_24

【和窦吏部雪中寓直】羊士谔

瑞花飘朔雪，灏气满南宫。
迢递层城掩，徘徊午夜中。
金闺通籍恨，银烛直庐空。
谁问乌台客，家山忆桂丛。

卷 332_25

【小园春至偶呈吏部窦郎中】羊士谔

松筱虽苦节，冰霜惨其间。
欣然发佳色，如喜东风还。
幽抱想前躅，冥鸿度南山。
春台一以眺，达士亦解颜。
偃息非老圃，沉吟闚玄关。
驰晖忽复失，壮气不得闲。
君子当济物，丹梯谁共攀。
心期自有约，去扫苍苔斑。



卷 332_26

【酬吏部窦郎中直夜见寄】羊士谔

解巾侍云陛，三命早为郎。
复以雕龙彩，旋归振鹭行。
玉书期养素，金印已怀黄。
兹夕南宫咏，遐情愧不忘。

卷 332_27

【永宁里园亭休沐怅然成咏】羊士谔

云景含初夏，休归曲陌深。
幽帘宜永日，珍树始清阴。
迟客唯长簟，忘言有匣琴。
画披灵物态，书见古人心。

芳草多留步，鲜飙自满襟。
劳形非立事，潇洒愧头簪。

卷 332_28

【登乐游原寄司封孟郎中卢补阙】羊士谔

爽节时清眺，秋怀怅独过。
神皋值宿雨，曲水已增波。
白鸟凌风迥，红蕖濯露多。
伊川有归思，君子复如何。

卷 332_29

【乾元初，严黄门自京兆少尹贬牧巴郡…十四韵刻于石壁】羊士谔

石座双峰古，云泉九曲深。
寂寥疏凿意，芜没岁时侵。
绕席流还壅，浮杯咽复沉。
追怀王谢侣，更似会稽岑。
谁谓天池翼，相期宅畔吟。
光辉轻尺璧，然诺重黄金。
几醉东山妓，长悬北阙心。
蕙兰留杂佩，桃李想华簪。
闭阁余何事，鸣驺亦屡寻。
轩裳遵往辙，风景憩中林。
横吹多凄调，安歌送好音。
初筵方侧弁，故老忽沾襟。
盛世当弘济，平生谅所钦。
无能愧陈力，惆怅拂瑶琴。



卷 332_30

【闲斋示一二道者】羊士谔

幽兰谁复奏，闲匣以端忧。
止惭先觉，归欤想故侯。
山蝉铃阁晚，江雨麦田秋。
唯有空门学，相期老一丘。

卷 332_31

【南池荷花】羊士谔

蝉噪城沟水，芙蓉忽已繁。
红花迷越艳，芳意过湘沅。
湛露宜清暑，披香正满轩。
朝朝只自赏，秣李亦何言。

卷 332_32

【郡中玩月，寄江南李少尹虞部孟员外三首】羊士谔

月满自高丘，江通无狭流。

轩窗开到晓，风物坐含秋。
鹊警银河断，蛩悲翠幕幽。
清光望不极，耿耿下西楼。
桂华临洛浦，如挹李膺仙。
兹夕披云望，还吟掷地篇。
凤池分直夜，牛渚泛舟年。
会是风流赏，惟君内史贤。
圆景旷佳宾，徘徊夜漏频。
金波徒泛酒，瑶瑟已生尘。
露白移长簟，风清挂幅巾。
西园旧才子，想见洛阳人。

卷 332_33

【城隍庙赛雨二首】羊士谔

零雨慰斯人，斋心荐绿蘋。
山风箫鼓响，如祭敬亭神。
积润通千里，推诚奠一卮。
回飙经画壁，忽似偃云旗。

卷 332_34

【郡楼晴望二首】羊士谔

霁色朝云尽，亭皋露亦晞。
褰开临曲槛，萧瑟换轻衣。
地远秦人望，天晴社燕飞。
无功惭岁晚，唯念故山归。
一雨晴山郭，惊秋碧树风。
兰卮谁与荐，玉旆自无惊。
云景嘶宾雁，岚阴露彩虹。
闲吟懒闭阁，旦夕郡楼中。



卷 332_35

【初移琪树】羊士谔

爱此丘中物，烟霜尽日看。
无穷碧云意，更助绿窗寒。

卷 332_36

【燕居】羊士谔

秋斋膏沐暇，旭日照轩墀。
露重芭蕉叶，香凝橘柚枝。
简书随吏散，宝骑与僧期。
报国得何力，流年已觉衰。

卷 332_37

【寄黔府窦中丞】羊士谔

汉臣旌节贵，万里护群祠。
夏月天无暑，秋风水不波。
朝衣蟠艾绶，戎幕偃雕戈。
满岁归龙阙，良哉伫作歌。

卷 332_38

【书楼怀古】羊士谔

何独文翁化，风流与代深。
泉云无旧辙，骚雅有遗音。
远目穷巴汉，闲情阅古今。
忘言意不极，日暮但横琴。

卷 332_39

【九月十日郡楼独酌】羊士谔

掾史当授衣，郡中稀物役。
嘉辰怅已失，残菊谁为惜。
楸轩一尊泛，天景洞虚碧。
暮节独赏心，寒江鸣湍石。
归期北州里，旧友东山客。
飘荡云海深，相思桂花白。

卷 332_40

【暮秋言怀】羊士谔

城隅凝彩画，红树带青山。
迟客金尊晚，谈空玉柄闲。
驰晖三峡水，旅梦百劳关。
非是淮阳薄，丘中只望还。



卷 332_41

【题枇杷树】羊士谔

珍树寒始花，氛氲九秋月。
佳期若有待，芳意常无绝。
袅袅碧海风，濛濛绿枝雪。
急景自馀妍，春禽幸流悦。

卷 332_42

【上元日紫极宫门观州民然灯张乐】羊士谔

山郭通衢隘，瑶坛紫府深。
灯花助春意，舞绶织欢心。
闲似淮阳卧，恭闻乐职吟。
唯将圣明化，聊以达飞沉。

卷 332_43

【西郊兰若】羊士谔

云天宜北户，塔庙似西方。
林下僧无事，江清日复长。
石泉盈掬冷，山实满枝香。
寂寞传心印，玄言亦已忘。

卷 332_44

【在郡三年，今秋见白发，聊以书事】羊士谔

二毛非骑省，朝镜忽秋风。
丝缕寒衣上，霜华旧简中。
承明那足厌，车服愧无功。
日日山城守，淹留岩桂丛。

卷 332_45

【郡中端居，有怀袁州王员外使君】羊士谔

忆作同门友，承明奉直庐。
禁闱人自异，休浣迹非疏。
珥笔金华殿，三朝玉玺书。
恩光荣侍从，文彩应符徐。
青眼真知我，玄谈愧起予。
兰卮招促膝，松砌引长裾。
丽日流莺早，凉天坠露初。
前山临紫阁，曲水眺红蕖。谁为音尘旷，俄惊岁月除。
风波移故辙，符守忽离居。
济物阴功在，分忧盛业馀。
弱翁方大用，延首迟双鱼。



卷 332_46

【山寺题壁】羊士谔

物外真何事，幽廊步不穷。
一灯心法在，三世影堂空。
山果青苔上，寒蝉落叶中。
归来还闭阁，棠树几秋风。

卷 332_47

【暇日适值澄霁江亭游宴】羊士谔

碧落风如洗，清光镜不分。
弦歌方对酒，山谷尽无云。
振卧淮阳病，悲秋宋玉文。
今来强携妓，醉舞石榴裙。

卷 332_48

【玩槿花】羊士谔

何乃诗人兴，妍词属舜华。
风流感异代，窈窕比同车。

凝艳垂清露，惊秋隔绛纱。
蝉鸣复虫思，惆怅竹阴斜。

卷 332_49

【郡斋读经】羊士谔

壮龄非济物，柔翰误为儒。
及此斋心暇，翛然与道俱。
散材诚独善，正觉岂无徒。
半偈莲生水，幽香桂满炉。
息阴惭蔽芾，讲义得醍醐。
迹似桃源客，身纓竹使符。
华夷参吏事，巴汉混州图。
偃草怀君子，移风念嗇夫。
翳桑俄有绩，宿麦复盈租。
圆寂期超诣，凋残幸已苏。
解空囊不智，灭景谷何愚。
几日遵归辙，东菑殆欲芜。

卷 332_50

【州民自言巴土冬湿且多阴晦今兹晴朗苦…因示寮吏】羊士谔

雨霜以成岁，看旧感前闻。
爱景随朝日，凝阴积暮云。
□□□□□，忘言酒暂醺。
□□□□□，□□□□□。

卷 332_51

【斋中有兽皮茵偶成咏】羊士谔

逸才岂凡兽，服猛愚人得。
山泽生异姿，蒙戎蔚佳色。
青毡持与藉，重锦裁为饰。
卧阁幸相宜，温然承宴息。

卷 332_52

【野夫采鞭于东山偶得元者】羊士谔

追风岂无策，持斧有遐想。
凤去留孤根，岩悬非朽壤。
苔斑自天生，玉节垂云长。
勿谓山之幽，丹梯亦可上。

卷 332_53

【守郡累年俄及知命聊以言志】羊士谔

南国疑逋客，东山作老夫。
登朝非大隐，出谷是真愚。
气直惭龙剑，心清爱玉壶。



聊持循吏传，早晚□为徒。

卷 332_54

【东渡早梅一树，岁华如雪，酣赏成咏】羊士谔

暇日留□事，期云亦□开。
乡心持岁酒，津下赏山梅。
晚实和商鼎，浓香拂寿杯。
唯应招北客，日日踏青来。

卷 332_55

【题郡南山光福寺寺即严黄门所置…即郗拾遗之词也】羊士谔

传闻黄阁守，兹地赋长沙。
少壮称时杰，功名惜岁华。
岩廊初建刹，宾从亟鸣笳。
玉帐空严道，甘棠见野花。
碑残犹堕泪，城古自归鸦。
籍籍清风在，怀人谅不遐。

卷 332_56

【雨中寒食】羊士谔

令节逢烟雨，园亭但掩关。
佳人宿妆薄，芳树彩绳闲。
归思偏消酒，春寒为近山。
花枝不可见，别恨灞陵间。

卷 332_57

【晚夏郡中卧疾】羊士谔

事外心如寄，虚斋卧更幽。
微风生白羽，畏日隔青油。
用拙怀归去，沉痾畏借留。
东山自有计，蓬鬓莫先秋。

卷 332_58

【酬卢司门晚夏过永宁里弊居林亭见寄】羊士谔

自叹淮阳卧，谁知去国心。
幽亭来北户，高韵得南金。
苔甃窥泉少，篮舆爱竹深。
风蝉一清暑，应喜脱朝簪。

卷 332_59

【山郭风雨朝霁怅然秋思】羊士谔

桐竹离披晓，凉风似故园。
惊秋对旭日，感物坐前轩。
江燕飞还尽，山榴落尚繁。



平生信有意，衰久已忘言。

卷 332_60

【南馆林塘】羊士谔

郡阁山斜对，风烟隔短墙。
清池如写月，珍树尽凌霜。
行乐知无闷，加餐颇自强。
心期空岁晚，鱼意久相忘。

卷 332_61

【腊夜对酒】羊士谔

琥珀杯中物，琼枝席上人。
乐声方助醉，烛影已含春。
自顾行将老，何辞坐达晨。
传觴称厚德，不问吐车茵。

卷 332_62

【池上构小山咏怀】羊士谔

玉立出岩石，风清曲□□。
偶成聊近意，静对想凝神。
牛渚中流月，兰亭上道春。
来心可见，寂寞为斯人。

卷 332_63

【林塘腊候】羊士谔

南国冰霜晚，年华已暗归。
闲招别馆客，远念故山薇。
野艇虚还触，笼禽倦更飞。
忘言亦何事，酣赏步清辉。

卷 332_64

【酬礼部崔员外备独永宁里弊居见寄来诗云图书…守山城】羊士谔

守土亲巴俗，腰章□汉仪。
春行乐职咏，秋感伴牢词。
旧里藏旧阁，闲门闭槿篱。
遥惭退朝客，下马独相思。

卷 332_65

【梁国惠康公主挽歌词二首（驸马即司空于公之子）】羊士谔

汤沐成陈迹，山林遂寂寥。
鹄飞应织素，凤起独吹箫。
玉殿中参罢，云輶上汉遥。
皇情非不极，空辍未央朝。
授册荣天使，陈诗感圣恩。

山河启梁国，缟素及于门。
泉向金卮咽，霜来玉树繁。
都人听哀挽，泪尽望寒原。

卷 332_66

【南池晨望】羊士谔

起来林上月，潇洒故人情。
铃阁人何事，莲塘晓独行。
衣沾竹露爽，茶对石泉清。
鼓吹前贤薄，群蛙试一鸣。

卷 332_67

【林馆避暑】羊士谔

池岛清阴里，无人泛酒船。
山蛭金奏响，荷露水精圆。
静胜朝还暮，幽观白己玄。
家林正如此，何事赋归田。

卷 332_68

【巴南郡斋雨中偶看长历是日小雪有怀昔年朝谒因成八韵】羊士谔

夷落朝云候，王正小雪辰。
缅怀朝紫陌，曾是洒朱轮。
气耿簪裾肃，风严刻漏频。
暗飞金马仗，寒舞玉京尘。
豸角随中宪，龙池列近臣。
蕊珠凝瑞彩，悬圃净华茵。
帝泽千箱庆，天颜万物春。
明廷犹咫尺，高咏愧巴人。

卷 332_69

【褒城驿池塘玩月】羊士谔

夜长秋始半，圆景丽银河。
北渚清光溢，西山爽气多。
鹤飞闻坠露，鱼戏见增波。
千里家林望，凉飙换绿萝。

卷 332_70

【资阳郡中咏怀】羊士谔

腰章非达士，闭阁是潜夫。
匣剑宁求试，笼禽但自拘。
江清牛渚镇，酒熟步兵厨。
唯此前贤意，风流似不孤。

卷 332_71

【寒食宴城北山池，即故郡守茱阳郑钢目为折柳亭】羊士谔

别馆青山郭，游人折柳行。
落花经上巳，细雨带清明。
鶗鴂流芳暗，鸳鸯曲水平。
归心何处醉，宝瑟有馀声。

卷 332_72

【酬彭州萧使君秋中言怀】羊士谔

右职移青绶，雄藩拜紫泥。
江回玉垒下，气爽锦城西。
皋鹤惊秋律，琴乌怨夜啼。
离居同舍念，宿昔奉金闺。

卷 332_73

【资中早春】羊士谔

一雨东风晚，山莺独报春。
淹留巫峡梦，惆怅洛阳人。
柳意笼丹槛，梅香覆锦茵。
年华行可惜，瑶瑟莫生尘。

卷 332_74

【郡楼怀长安亲友】羊士谔

残暑三巴地，沉阴八月天。
气昏高阁雨，梦倦下帘眠。
愁鬓华簪小，归心社燕前。
相思杜陵野，沟水独潺湲。

卷 332_75

【王起居独游青龙寺玩红叶因寄】羊士谔

十亩苍苔绕画廊，几株红树过清霜。
高情还似看花去，闲对南山步夕阳。

卷 332_76

【夜听琵琶三首】羊士谔

掩抑危弦咽又通，朔云边月想朦胧。
当时谁佩将军印，长使蛾眉怨不穷。
一曲徘徊星汉稀，夜兰幽怨重依依。
忽似摐金来上马，南枝栖鸟尽惊飞。
破拨声繁恨已长，低鬟敛黛更摧藏。
潺湲陇水听难尽，并觉风沙绕杏梁。

卷 332_77

【彭州萧使君出妓夜宴见送】羊士谔

玉颜红烛忽惊春，微步凌波暗拂尘。
自是当歌敛眉黛，不因惆怅为行人。

卷 332_78

【题松江馆】羊士谔

津柳江风白浪平，棹移高馆古今情。
扁舟一去鸥夷子，应笑分符计日程。

卷 332_79

【偶题寄独孤使君】羊士谔

病起淮阳自有时，秋来未觉长年悲。
坐逢在日唯相望，袅袅凉风满桂枝。

卷 332_80

【永宁里小园与沈校书接近，怅然题寄】羊士谔

故里心期奈别何，手移芳树忆庭柯。
东皋黍熟君应醉，梨叶初红白露多。

卷 332_81

【斋中咏怀】羊士谔

无心唯有白云知，闲卧高斋梦蝶时。
不觉东风过寒食，雨来萱草出巴篱。

卷 332_82

【登郡前山】羊士谔

洛阳归客滞巴东，处处山樱雪满丛。
峴首当时为风景，岂将官舍作池笼。

卷 332_83

【客有自渠州来说常谏议使君故事，怅然成咏】羊士谔

才子长沙暂左迁，能将意气慰当年。
至今犹有东山妓，长使歌诗被管弦。

卷 332_84

【春日朝罢呈台中寮友】羊士谔

退食鹓行振羽仪，九霄双阙迥参差。
云披彩仗春风度，日暖香阶昼刻移。
玉树笼烟鹄鹊观，石渠流水凤凰池。
时清执法惭无事，未有长杨汉主知。

卷 332_85

【州民有献杏者，瑰丽溢目，因感花未几，聊以成咏】羊士谔

南郭东风赏杏坛，几株芳树昨留欢。
却忆落花飘绮席，忽惊如实满雕盘。
蛾眉半敛千金薄，鹧鸪初鸣百草阑。
志士古来悲节换，美人啼鸟亦长叹。

卷 332_86

【西川独孤侍御见寄七言四韵…翰墨都捐逮此酬答诚乖拙速】羊士谔

百雉层城上将坛，列营西照雪峰寒。
文章立事须铭鼎，谈笑论功耻据鞍。
草檄清油推健笔，曳裾黄阁耸危冠。
双金未比三千字，负弩空惭知者难。

卷 332_87

【都城从事萧员外寄海梨花诗，尽绮丽至惠然远及】羊士谔

珠履行台拥附蝉，外郎高步似神仙。
陈词今见唐风盛，从事遥瞻卫国贤。
掷地好词凌彩笔，浣花春水腻鱼笺。
东山芳意须同赏，子看囊盛几日传。

卷 332_88

【赴资阳经嵒冢山（汉水所出，元和三年已授此官）】羊士谔

宁辞旧路驾朱轡，重使疲人感汉恩。
今日鸣驺到嵒峡，还胜博望至河源。

卷 332_89

【郡中言怀寄西川萧员外】羊士谔

功名无力愧勤王，已近终南得草堂。
身外尽归天竺偈，腰间唯有会稽章。
何时腊酒逢山客，可惜梅枝亚石床。
岁晚我知仙客意，悬心应在白云乡。

卷 332_90

【郡斋感物寄长安亲友】羊士谔

晴天春意并无穷，过腊江楼日日风。
琼树花香故人别，兰卮酒色去年同。
闲吟铃阁巴歌里，回首神皋瑞气中。
自愧朝衣犹在篋，归来应是白头翁。

卷 332_91

【息舟荆溪，入阳羨南山，游善权寺，呈李功曹巨】羊士谔

结缆兰香渚，柴车上连冈。
晏温值初霁，去绕山河长。
献岁冰雪尽，细泉生路傍。
行披烟杉入，激涧横石梁。
层阁表精庐，飞甍切云翔。
冲襟得高步，清眺极远方。
潭嶂积佳气，萸英多早芳。
具观泽国秀，重使春心伤。

念遵烦促途，荣利骛隙光。
勉君脱冠意，共匿无何乡。

卷 332_92

【乱后曲江】羊士谔

忆昔曾游曲水滨，春来长有探春人。
游春人静空地在，直至春深不似春。

卷 332_93

【寻山家（一作长孙佐辅诗）】羊士谔

独访山家歇还涉，茅屋斜连隔松叶。
主人闻语未开门，绕篱野菜飞黄蝶。

卷 332_94

【寄裴校书】羊士谔

登高何处见琼枝，白露黄花自绕篱。
惟有楼中好山色，稻畦残水入秋池。

卷 332_95

【句】羊士谔

风泉留古韵，笙磬想遗音。
桂朽有遗馥，莺飞安可待。
尘沙蔼如雾，长波惊飙度。
雁起汀洲寒，马嘶高城暮。
银缸倦秋馆，绮瑟瞻永路。
重有携手期，清光倚玉树。
（以上见张为《主客图》）